


CELEBRACIÓN EN OS COTOS

4-5 de outubro do 2025

XXVII SEMANA DO TEMPO ORDINARIO C



NON MÁIS
VIOLENCIA
DE XÉNERO



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 **nº 4** *Amigos nas penas*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Xesús cos contos que lle fomos escoitando estas semanas pasadas foi amosándonos o seu xeito de vivir, pero o mundo de hoxe segue achegándonos cousas que non podemos entender.

Non podemos entender e sentimos vergoña polo maltrato ao que se ven sometidas as xentes de Palestina, sentimos rabia ante os lumes mal intencionados dos nosos montes, sentimos desacougo ante todas as vidas que afogan no mar cando obrigados foxen das súas terras, sentimos frustración ante o maltrato no que malviven moitas mulleres, sentimos medo ante a falta de paz e os abusos da violencia de Israel.

Non podemos entender ningunha destas cousas por iso hoxe pedimos que o Señor aumente a nosa fe, para así, seguindo o seu exemplo tratar nós de mellorar co noso esforzo, e dende aquí, a nosa sociedade, a nosa humanidade. Co alento da nosa fe e cos feitos das nosas mans queremos facelo mellor.

ACTO PENITENCIAL

Celebrante: *É evidente que non sempre o facemos ben, e con facilidade esquecémonos de Deus e esquecémonos dos demais preocupándonos só de nós mesmos. Rápido culpamos aos demais e cústanos asumir a nosa culpabilidade. Agora é momento de pedir perdón.*

Monitor/a

- ✓ Perdón Señor polas veces que non te vemos ao noso lado facendo camiño cos demais, e pechamos as portas. Señor, téndenos a túa man
- ✓ Perdón Señor polas veces que non nos acordamos de Ti, e só queremos o noso ben aínda que sexa a costa de moitos. Cristo, téndenos a túa man
- ✓ Perdón Señor polas veces que somos demasiado desconfiados, e somos cristiáns de pouca fe porque nos faltan feitos. Señor, téndenos a túa man

Celebrante: *Deus, Pai agarimoso, ten piedade de nós, dos que teñen un lugar no noso corazón, e dos que dubidan e non atopan fe na súa vida. A todos confiamos que nos concedes o perdón dos pecados e por Cristo Resucitado nos levas á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentándolle a Deus no silencio o que rebule no noso interior e as nosas intencións para esta semana na que imos dar comezo ás xornadas de catequese. Pousamos tamén nas mans de Deus Pai a nosa preocupación polas xentes de Palestina ás que non se lle deixa nin tan sequera ter vida.*

(Silenzo)

Celebrante:

Deus, noso Pai, o teu amor é tan grande que sobrepasa os méritos e mesmo os desexos dos que che suplican. Móstranos a túa misericordia, perdóanos o que oprime a nosa conciencia e concédenos o que nin sequera nos atrevemos a pedir. Pedímoscho por Xesucristo, que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *As palabras da carta de San Paulo que agora imos escoitar queren ser palabras de ánimo ante as dificultades. O camiño é seguir os pasos da caridade de Cristo.*

O evanxeo é a proposta de medrar na fe dando exemplo do evanxeo. Fagamos o que temos que facer para ser cribles, e neste bo facer irá medrando a nosa fe.

LECTURA DA SEGUNDA CARTA DE SAN PAULO A TIMOTEO

Benquerido irmán:

Recórdoche que reavives o carisma de Deus, que hai en ti pola imposición das miñas mans. Porque Deus non nos deu un espírito feble senón forte, de amor e de sobriedade. Non teñas vergonza de noso Señor, nin de min, preso por el; ao contrario, faite partícipe dos meus sufrimentos polo Evanxeo, contando co poder de Deus. Mantén coma regra as palabras saudables que me escoitaches verbo da fe e da caridade de Cristo Xesús. Garda o precioso depósito por medio do Espírito Santo, que mora en nós.

Palabra do Señor

🎵 n° 41 *Quen nos vai separar de Ti* SALMO

(en pé) No Leccio I C páx 262 Lc 17, 5-10 EVANXEO

PROCLAMACIÓN DO SANTO EVANXEO SEGUNDO LUCAS

Daquela, rogáronlle os apóstolos a Xesús:

- Señor, ¡aumentanos a fe!

O Señor respondeulles:

- Se tiverades polo menos unha fe coma un gran de mostaza, diríadeslle a esta moreira: "Arríncate e plántate no mar", e seguro que vos obedecía.

E, quen de vós que teña un criado labrando ou pastoreando, lle di cando chega da veiga:

"Entra axiña e ponte á mesa".

Non lle dirá máis ben:

"Prepara a cea, viste a roupa de traballo e ponme a comida; e cando eu remate de comer e beber, comerás e beberás ti?"

Ou é que aínda lle vai ter que estar agradecido ao criado por facer o que lle manda?

Así tamén vós, cando fagades todo o que se vos mande, dicide:

"Somos simples servidores: total, non fixemos máis do que tiñamos que facer".

Palabra do Señor

(sentad@s) gardamos uns instantes de silencio para acoller a palabra no corazón



A xeito de homilía

Os apóstolos dinlle a Xesús que lles aumente a fe, e El de resposta fala dos feitos e fala das responsabilidades coas que facerse cribles.

Así Xesús ensina aos apóstolos e a nós mesmos que non podemos alonxar a fe dos feitos porque son dúas realidades que van da man.

A fe vai da man dos feitos na loita pola dignidade de cada home, muller, neno e nena das terras de Palestina, como no seu día fixo Xesús.

A fe vai da man dos feitos ao sentirse comunidade, e para facer comunidade todos somos necesarios. Todos sabemos, valemos e podemos para facelo mellor como parroquia.

A fe vai da man dos feitos cando se pode contar con nós para un mellor coidado da natureza e da terra.

A fe vai da man dos feitos porque unha fe sen feitos é unha fe morta.



**Cando facemos crible a fe,
non fixemos máis
que o que tiñamos que facer.**

Hoxe, nós, para facelo ben
contamos co exemplo
e coa fe en Xesús,
e El conta con nós
e os demais contan con nós.

PROFESIÓN DA FE

Celebrante *Despois de escoitar como os Apóstolos pedían a Xesús que lles aumentara a fe, tamén hoxe nós facémolo na responsabilidade do credo que compartimos*

♪ ***Creo, Señor, pero aumenta a miña fe***

Monitor/a:

Crede en Deus,

o Pai que que ama a todos sen diferenza e que desexa un mundo no que todas as persoas sexamos adultas e responsables na fe?

Creo, Señor, pero aumenta a miña fe

Crede en Xesús Cristo, noso irmán,

que nos convida a compartir á súa beira e que desexa de nós palabras e feitos que demostran evanxeo?

Creo, Señor, pero aumenta a miña fe

Crede no Espírito Santo,

que nos alenta nos feitos de dar vida á Paz, que nos alenta a non calar a violencia porque o silencio fainos cómplices?

Creo, Señor, pero aumenta a miña fe

Crede na Igrexa,

comunidade que necesita das nosas mans e dos nosos esforzos, para ser exemplo de fe?

Creo, Señor, pero aumenta a miña fe

ORACIÓN UNIVERSAL

Celebrante: *Fiándonos de Xesús, ergamos a nosa voz ao Pai deixando que o corazón fale dos mellores desexos para nós, para os Cotos e para toda a humanidade dicindo: Señor, acolle a nosa oración*

Monitor/a

- ✓ Pedimos xustiza e paz para non calar o xenocidio que viven os veciños e veciñas de Palestina. A nosa fe necesita destes feitos. Oremos
- ✓ Pedimos polas persoas que formamos a igrexa, porque crer non é rutinas e aparencias, é máis ben demostrar cos feitos o camiño do evanxeo. Oremos
- ✓ Pedimos polas persoas que viven sen fe, sen esperanza, que xa están de volta de todo, e que escandalizamos cando a nosa fe non ten feitos. Oremos
- ✓ Pedimos pola persoas que comparten unha fe diferente, para que iso non nos impida construír xuntos un mundo con mellores feitos. Oremos
- ✓ Pedimos polas persoas que usan a fe e a relixión para o seu propio proveito, e mesmo a usan para danar e facer menos aos que non cren do mesmo xeito. Oremos

Celebrante: *Pai, grazas por escoitar esta nosa oración compartida, e grazas por escoitar tamén as pregarías que quedan gardadas no noso corazón. Por Cristo, noso Señor. Amén*

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: *Rezamos agora a oración de Xesús, a oración de irmáns, a oración de quen confía, a oración que nos compromete na procura dun mundo máis xusto e cos mellores feitos. Dicimos:*

NOSO PAI ...



SIGNO DA PAZ

Celebrante: *A fe sen feitos está morta, non leva a nada. Cando lle pedimos ao Señor que nos aumente a fe pedímoslle unha man para os feitos porque sabemos que a paz require esforzo e valentía para facerse. Así, dende as mans de Xesús, facemos crible o camiño da paz. Está nas nosas mans facelo mellor.*

🎵 **Fagamos a paz irmáns**

COMUÑÓN

Celebrante: *Esta mesa, este altar é signo do compartir na vida. Participar hoxe é comprometerse para medrar no camiño da fe, porque seguir a Xesús esixe facer evanxeo, e ditosos nós que o facemos estando convidados a compartir este pan do Señor.*

Señor, eu non son merecente de que entres no meu fogar, mais unha palabra túa abonda para me salvar

🎵 **nº 53 Onda Ti noso Pai**

4.- AVISOS E DESPEDIDA

ORACIÓN FINAL

Celebrante:

Señor, acompaña coa túa protección constante ao pobo que renovaches na fe compartida coma comunidade.

Hoxe comprendemos que so cos nosos feitos podemos facer crible a nosa fe.

Confiamos en que o noso bo e ben facer nos faga merecentes da salvación eterna. Pedímoscho a Ti que vives e reinas por sempre eternamente. Amén

Xesús convídanos a que nos fíemos de Deus, porque El confía en nós, nas nosas palabras e nos nosos feitos.

Que as palabras coas que hoxe temos rezado nos sigan dando azos para vivir dende a tolerancia e o respecto con quen pensa, vive e cree diferente.


RECORDATORIO DE CATEQUESE

Esta semana empezamos a catequese:

o xoves en Fornelos os nenos e nenas de primaria,
o venres en Fornelos os de secundaria,
e o sábado en Moscoso os de primaria e secundaria.

Para esta primeira sesión cos nenos pedimos que estea presente o pai ou a nai, pois ao tratarse dunha actividade con menores necesitamos a autorización expresa pola lei de protección de datos.

Tamén empezamos o venres en Fornelos os ensaios de guitarra.



“Señor, auméntanos a fe”

*Palabras dos discípulos
no evanxeo de hoxe*

***Avísase das misas
(ver folla do mes)***

***Que teñamos un bo día,
unha boa semana
e o Señor nos bendiga, †
nos garde de todo mal
e nos leve ao seu fogar
de vida eterna. Amén***

Podémonos ir en paz. Dámoslle grazas a Deus